

Date – 28/06/2026

Time - 18:30 -18:40Hrs

AKASHVANI AIZAWL
REGIONAL NEWS BULLETIN
HEADLINES (EVENING)

1. Electoral roll Special Intensive Revision (SIR) kal mekah Mizoramah mitthi tawh leh chhan hrang hrang vanga hming paih a nih hnu-ah vote nei mi nuai 8, sing 2, sang 8 leh 877 an awm.
2. Sorkar laipuiin khua-leh-tui a thlawna damdawi-ina inenkawl theihna a siam, Ayushman Bharat - Pradhan Mantri Jan Arogya Yojana (AB-PMJAY) chu Mizoramah mi sing 3, sang 3 chuangin an hmang tawh.
3. ICAR-IARI, New Delhi-in Agricultural Drought Bulletin-a tihchhuahah Mizoram chu Nagaland dawtah ram chung state zinga khawkheng tuar nasa ber a ni.
4. Prime Minister Narendra Modi-a'n ram siam thatna kawnga mipui an tel ve zel chu India tan rohlu a tling a ni, a ti.

<><><>

EF DIGITISATION

Electoral roll Special Intensive Revision (SIR) kal mekah Mizoramah mitthi tawh leh chhan hrang hrang vanga hming paih a nih hnu-ah vote nei mi nuai 8, sing 2, sang 8 leh 877 an awm.

Vawiin hi tuna SIR kal mek a Booth Level Officer (BLO)-te’n enrolment form sem leh lakkhawm hun atana Election Commission of India (ECI)-in hun a bithliah tawp ni a ni a. Puan tawh angin enumeration form digitize hna hi Ningani khan Mizoramah chuan zawhfel a ni tawh a, vawiin khan engkim chinfel hman a ni. Nikum electoral roll-ah khan vote nei mi nuai 8, sing7, sang 5, leh 68 an awm a. Tuna thliar fel a nih hnuhian vote nei mi nuai 8, sing 2, sang 8 leh 877 an awm ta ani. Nikum electoral roll a chuang thi tawh mi 21,290 an awm a, mi 8,352 chu an awmna hmuhchhuah zawh loh leh biak pawh theih loh an awm a, mi 13,992 zet chu insawn hlen an ni a, mi 2,245 chu ziahluh sa tawh an ni. Hei bakah hian mi 312 chu sakhaw rinna avanga electoral roll-a inziaklut duh lo an awm bawk a. Kum 2025 electoral roll atanga chhut chuan tuna electoral roll a hming chuang zat hi za zela 94 point 72 a ni a, a tlem takna hi za zela 5 point 28.

SIR kal mekah hian Election Commission chuan May ni 30 leh June ni 28 inkar chhung hi enumeration form chinfel hun atan a ruat a. BLO-te chu an bial chhunga in tin vawi 3 tal tlawh chhuak a, form sem leh lakkhawm hna thawk turin a bituk a. Mizoram chuan hun tiam hma a zo in tuna SIR thawh thumna kalpuina state 16 leh UT 3 zingah a zo hmasa ber a ni.

Draft electoral roll hi Inrinni (July ni 4) khian tihchhuah a ni ang a. July ni 4 leh August ni 4 inkarah sawisel tur emaw inthun duh nei emaw tan hun hawn niin he’ngte hi September ni 2 thleng chinfelna hun siam a ni a. SIR hnuai a electoral roll tak tak chu September ni 6-ah tihchhuah a ni dawn a ni.

RATIONALISATION OF PS

Mizorama polling station 52 a tihpun rawtna chu Election Commission of India chuan a pawm a, polling station 1,353 a awm tawh dawn a ni.

Election Commission of India (ECI)-in SIR kalpui dan tur a duan lawk angin vawiin, June ni 28 hi polling station siamrem ni (rationalisation of polling station) atana hman turin a ti a. Mizoram Chief Electoral Officer (CEO) pisa-in polling station awm sa 1,301 bakah 52 siam belh tura rawtna a siam chu ECI hian a pawm tawh a. Polling station thar siam nen hian a vaiin Mizoramah polling station 1,353 a awm ta a ni. Vawiin khan online hmanga polling station siam danglam hi peihfel vek a ni tawh a ni. ECI duhdan angin polling station hi vote neite awmna atanga kilometre 2 aia hla ke a kal ngai lo tura dah tur a ni a. Rual khai zawka polling station a vote nei awm zat siamremna atan hian ECI chuan polling station tina vote awm zat hi 1,200 aia tam lo turin a thupek a siam a. Chutiang chuan polling station hi siam rem a ni ta a ni.



12 YEARS OF NDA

Sorkar laipuiin India khua leh tui kum 70 chin chunglamin a thlawna damdawi-ina inenkawl theihna a siam, Ayushman Bharat - Pradhan Mantri Jan Arogya Yojana (AB-PMJAY) chu Mizoramah mi sing 3, sang 3 chuangin an hmang tawh.

Aksahvani News Aizawl-in a kawmnaah, BJP Mizoram IT & Media Cell Prabhari Pi K.Vanlalruati chuan AB-PMJAY chu India khua leh tui kum 70 chin chunglam tute pawhin an hman theih a ni tih sawiin, Mizoram chhunga sorkar damdawi in leh state pawna Mizoram sorkar empanelled damdawi in zawng zawngah te a thlawna an inenkawl theihna a ni a ti a. AB-PMJAY hian MUHCS a huam tel vek avangin AB-PMJAY card nei te tan a hranpa in MUHCS a inzhiah luh a ngai lo tih sawiin, AB-

PMJAY-a inziak lut tur hian pawisa chawi a ngai ve lova, Health & Family Welfare department pisa bakah BJP Mizoram office leh common service centre (CSC)-ah te a inziah luh theih tih a sawi a. AB-PMJAY hi Mizoram mipuiten an hre tawk lo hle nia an hriat thu leh tun dinhmunah Mizoramah mi sing 3, sang 3 chuanguin an hmang tawh nia a hriat thu a sawi baw.

BJP Mizoram State Media Convener, Pu Johny Lalthanpuia chuan AB-PMJAY hnuaiah hian kum 1-ah cheng nuai 5 man thleng a thlawnin inenkawl na a dawn theih niin a sawi a. Ama pa ngei pawh Civil Hospital-a enkawl a nih laiin AB-PMJAY hi an hmang tangkai hle tih sawiin, ni khata hman theih zat bituk pawh awm lovin a thlawnin enkawl na tha tak an dawng a, lawmawm a tih thu a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

DROUGHT

ICAR-IARI, New Delhi-in Agricultural Drought Bulletin-a tihchhuahah Mizoram chu Nagaland dawtah ram chung state zinga khawkheng (drought) tuar nasa ber a ni.

Indian Council Of Agricultural Research- Indian Agricultural Research Institute, ICAR-IARI, New Delhi hnuaia Division of Agricultural Physics, CREAMS Lab-in tun thla, June ni 25-a Agricultural Drought Bulletin-in, ni 16 chung, tun thla June ni 10 atanga June ni 25 inkara ram chungha Agricultural Drought dinhmun a tarlan danin Mizoram chung hmun zaa 44.2 chuang chuan khawkheng nasa tak, ‘extreme drought’ a tuar a, Nagaland

za zela 68 point 5 dawtah ram chhung state zinga khawkheng tuar nasa ber a ni . CREAMS Lab scientist te chuan Mizoram pumpui zatve dawna Extreme drought a thleng hian khawkheng thleng thin titem tura hmalak a ngaih bakah tui hna humhalh leh sik leh sa inthlak danglam tuar thei tur zawnga lo neih dan her rem a tul zia a lantir niin an sawi a ni.

Khawkheng hi lei hnuaia tui a tlem lutuk avanga thlai chi hrang hrangte mamawh phuhru thei khawpa lei a hnawn lovin a thleng thin a. Agricultural drought hi ruahtui tlak tlem vang chauh ni lovin, buh leh thlai thar chhuah a tlakhniam dan hmangin teh thin a ni.



CADC POLITICS

Chakma Autonomous District Council (CADC)-ah tunkar chho hian BJP leh ZPM sorkar (executive committee) a pian theihna atan ruahmanna siam chhoh a nih rin a ni.

CADC-a BJP District President Pu Durjya Dhan Chakma chuan BJP leh ZPM-in an din Chakma Democratic Alliance Legislature (CDAL) Party hruaitu Minister hlui Pu Nirupam Chakma kaihhruai executive committee din turin tunkar chho hian hmasawнна a awm a rin thu Akashvani News Aizawl a hrilh a. Pu Nirupam Chakma hian kar kal ta Thawhlejni khan sorkar a siam theih thu District Council & Minority Affairs Secretary kaltlangin larsap a lo hriattir tawh niin Pu DD Chakma chuan a sawi a. CADC-a BJP leh ZPM thawhhona CDAL hruaitu Pu Nirupam Chakma hi larsap chuan chief executive member (CEM) a a ruatna thupek a chhuah thuai an beisei thu a sawi. CDAL-in an inchhal dan chuan thlan tlin member 20 awmna CADC-ah hian BJP (MDC) 10 leh ZPM MDC 9, a vaiin 19 an awm a. Eptu MDC awm chhun chu MNF MDC Pu Rasik Mohan Chakma chauh niin an sawi a ni.



MANN KI BAAT

Prime Minister Narendra Modi-a’n ram siam thatna kawnga mipui an tel ve zel chu India tan rohlu a tling a ni, a ti.

He thu hi vawiin Akashvani-a Mann Ki Baat hun a hmanna-ah sawiin Asia thlang lam biala indona boruak awm mek avanga ram mipuite hnena ngenna chi hrang hrang a siam chuan thlawp a hlawh tha hle, a ti a, mipuite chu rangkachak lei lo turte, ram pawna zin chhuak rih lo turin leh hun engemawti chhung chu vah chhuah nana lirthei inhman tawm uar tura a ngenna-in zawm a hlawh that avangin ram khua leh tui zawng zawngte hnenah lawmthu a sawi a ni.



VENEZUELA QUAKE DEATH TOLL

Venezuela-a lirnghing na tak thleng avanga thi zat chu mi 1430 an tling tawh a, mi 68,900 vel, chin hriat lohvin an la awm mek bawk nia sawi a ni.

Nilaini kaltaa 7.2 leh 7.5-a naa lir nghing hian building tam tak a sawi chim a, vawiin thlengin chhanchhuah hna, ngawrh taka thawh chhunzawm zel a ni.

